

Siullertut tamassi inuiattut ullorsiornitsinnik pilluaqquassi,-
qujanarlu København-imi Kalaallit Illuannut,- ukioq manna
oqalugiartussatut aggersaaneranut.

Aallarniutigalugu oqaatigerusuppara tamatta akunnattooruteqarata
nalunngilluariigarput .

Oqaatigerusupparami inuiaagatta kinaassuseqartut
tulluusimaarutissaqarluartut.

Inuiaavugut pinnissusillit, nukittuut ataqatigiissullu ullullu tamaasa
nunatta pinngortitarsua nukerpassuilu pigisai ilutsinni
tigummiuarpagut.

Qularnanngitsumillu uagut kalaallit Qallunaat Nunaanni
najugaqartuusugut, nukittussuseq kalaaliussuserlu, Nunatsinni
inuusunilluunniit piginerusarparput.

Uagummi -ullut tamaviisa angerlarsertuatuuvugut.

Ullut tamaasa, qanigisagut kissalaartumik eqqaajuartarpagut.

Ullut tamaasa, tulliani tikeraarlutalu angerlaqqilluta, ilaqutatsinnik
takunneqqinnissarput, eqqarsaatigisarpagut.

Aammali ullut tamaasa suliarortutta, ikinngutitsinnik ilaqarutta,
atuarutta, immiussigutta, illoqarfimmiikkutta allatulluunniit
sugutta, allanut kinaassuserput pillugu, illersuinissamut
piareersimajuartussaavugut,

-sumiinnerput pisariaqartinneqarpat nassuiassallugu,
oqaluttuarisaanerput ilisaritissallugu, piorsarsimassuserput
ersertissallugu,-

kiisalu inuusimanerput

siunissamilu takorluukkagut nassuiassallugit.

Tamannalumi pisussaaffittut akuersaagaraarput – ullut
tamarluinnaasa.

Kalaaliuvugummi kinaassuseqartut – artorsaratik imminut
nammassinnaasut,

tamannalu naapitatsinnut tamanut takutikkumasarparput
isertuanertaqanngitsumik saqqummiuttarlugu.

Tassaavugut inuiaat amerlanngitsut pinnissusillillu – inuiaat
immineq ileqqorpassuaqartut immikkuullarilluinnarmillu
inooriaaseqartut, nunarsuarmi kusanaqisumi – pinngortitarsuarmi
Tupinnaannartumi immikkuullarilluinnartumik.

-Kisiannili –

Nunarput aamma tarrajunnersaqarpoq kanngusuuteqarata
oqaluttuarisinnaasariaqakkatsinnittaaq.
Nalunngereeratsigimmi.

Tarrajunnersat

Inuiaqatigiinni ajornartorsiutit,
imigassamik ajornartorsiutit,
persuttaasarnerit,
atornerluisarnerit,
pinngitsaaliisarnerit, ikiaroortarnek, eqqunngitsumik
atoqateqartarnek, imminornerit il.il..

-Ajornartorsiutit uagut allaat qanoq iliuuseqarfigissalugit
akunnattoorfeqarfigisagut.

Uangami nammineq ikinngutinnut nassuiaatissaarussinnaasarpunga
aperigaangata ajornartorsiutigut pillugit, aammalu aperigaangata
siunissaq qanoq isikkoqarnerseq.

Maannakkorpiaq ernumassutikka siunissami ipput –
siunissarpummi qanoq ippa?
Siunissarpormi suua?

Apeqqut taanna uanga akisinnaanngilara – siunissarmi meeqqani
inuusuttunilu immat.

Kalaallisut immikkuullarissuserput pillugu oqaluttuaraangama taava misigisaq aaliangersimasoq taamaakkaluartorli takkuttuarterpoq – misigissuseq oqartutut ittoq: Isasoortinneqassanngilatit tummaarineqarlutilluunniit – ataqqinassuseqartuassaatimmi nukittullutillu!

Nalunngilara ilissi tamanna ilisaralugulu paasilluarsinnaagissi.

Qinnuvigiumavassi misigissutsit taasatut ittut, tigummeqqullugit taallannguamik atuaaninni.

Tusarnaarnissinnimi misigissuseq taanna nukittorsassavarsi.

Taallannguaq arnamit Nuummi najugaqartumit ukiorpassuit matuma siorna – tassa 3-nik ukioqarneranit,- eqqaamasatut qaffakaatitaapput:

Taallaq – ”ikiorsinga”

Nunarujussuatsinni inuiaqatigiinnguusugut akunnitsinni

Meeraqarpallaarpoq sumiginnagaasunik.

Meeqqat nakkutigineqanngitsut

Meeqqat atornerlugaasut

Meeqqat imminut paarisariaqartut

Ikiorneqanngitsut

Kaallutik innartartut

Qinigassinneqanngitsut

Periarfissaqartitaanngitsut

Il.il

- **Meeqqat inuusuttullu silarsuarmut ingerlatinneqartut asanninnermik nukittorsaatisanillu allanik, ikorfaqartitaanatik. Taamaamat tamakku ilarpassui angajoqqaamisulli inississapput, tassa inuiaqatigiinni ikorfartorneqanngikkunik pitsaasumik ingerlariarfissaarutitaasutut.**

Akueriumanngikkaluarutsiguluunniit taamaappoq!

Tamangajattami ilisarimasaraqpugut taaneqartutut atugaqarsimasunik.

Qanorli iliorsinnaavugut?

Ataatsimoornerusumik isiginnikkutta –

taava uanga nalornivunga qanoq iliornissaq siunnersuutigissallugu.

Kisiannili piareersimavunga imminut aperissallunga,

misilillugu iliuuseqaqataajumanerlunga!

Meeqqat pineqalerpata – akunnattooruteqanngilanga,

tassaniippullu ullumikkut oqaatigerusutukka.

-Taakkumi qanoq iliorluta ikiorsinnaavugut?

Nalunngilara nunatsinni tarrajunnersat taaneqartutut ittut,

ilaatigut annertungaartaramik tunniutiinnaqqajaaffiusartut.

Isuma qarluinnarpungali aamma Qallunaat Nunaanniit uagut

pitsanngorsaaniarnermi peqataasinnaalluartugut.

Tamaviaartariaqassaqaagut uangalu isumaqarpunga
salliuittariaqarigut – meeqqat.

Qujanartumillu taamatut isumaqartut amerlarpasittarput,
tamanna suliniuteqartarnerit takutippaat.

Maannami Kalaallit Nunatsinni maanilu Qallunaat Nunaanni
suliniaqatigiiffiit arlaqartut aallartissimapput,
meeqqat atukkamik qaffassaaffigineqarnissaannik
suliniuteqartuusut.

Ullumikkullu ilisaritikkumasara tassaavoq meeqqanik inuusuttunillu
ikiuiniarluni suleqatigiiffik NANU.

Uanga nammineq ilaquuttakka suliniummi tassani annertuumik
akuupput, taamaammat taannarpiaq uanga soqutigisarigakku
tupinnanngilaq.

Suliniaqatigiiffimmi angajunnit uianillu Nuummi najugaqartunit
pilersitaavoq.

Taakkumi takusat avaangunartut aqqusaarsimasatik
aallaavigalugit misigisimalersimapput iliuuseqartariaqarlutik.

Maani Danmark-imi NANU uani illumi
immikkoortorta qarfinnguaqarpoq.

Politikkimut attuumassuteqanngitsumik sulivugut,-
makku angujumallugit:

Isumaginninnikkut akisussaassuseqarnerusumik sulilernissaq
aammalu erseqqarissumik aaliangersimasunillu,
nunarput tamakkerlugu suliniuteqarnikkut timitalimmik
ingerlasoqalernissaanik qulakkeerinneqataanissaq maannamiit
malunniuteqartussamik.

Takorluukkagut makkuupput:

Peqataanissaq inuiaqatigiit toqqissisimanissaannut, nuannaarlutik
inuusinnaanissaannut kiisalu nunatsinni meeqqat tamat
naleqartumik inuunissaannut aqqutissiuuseqataanissaq.

Nalunngilagut kivinniakkat imaannanngeqisut.
Kisianni aamma nalunngilarput iliuseqartoqanngippat, taava
timitalimmik pisoqarnavianngitsoq.

Amerlanerpaammi misigisimapput iliuseqartariqartugut.
Tamannalu eqqarsaatikkut misigisimagutsigut,
taava isumaqarpunga timitalerniarlugu iliuseqartariaqartugut.

Nalunngilara aallartitat tamarmik sunniuteqarnissamut piffissamik
pisariaqartitsisartut,-
paasisinnaalluarparalu ilaatigut tamanna
utaqqiuminaassinnaasarmat.

Kisiannili siunnerfik upperigaanni – taava aqutissaqarpoq.
Aqutinilu suni tamani,- inoqatit naapitassaasarput.

Taamaammat nuannersortaa unaavoq – iliuseqartoqarsinnaammat
- ataatsimoorlutalu allanngueqatigiissinnaagatta.
- Taamak iliorluta nunatsinni siunissap qaamasuunissaanut
aqutissiueqataasinnaavugut.

Taamaallusi illumut pulaarisigut, ullumiluunniit ornilarluta,
annertunerusumik paasiniaallusi.
Periarfissarlu taanna avammut ilisaritillugu,- siammartereqataagit.
Oqaatigereersinnavaralu Kalaaliusugut TIVOLI-mi
nuannarsaqatigiilerutta uagut NANU-mit aamma najuutissagatta.

Taamatut oqaaseqarlunga tamassi aammaarlunga inuiattut
ullorsiorluarnissamik kissaallusi uummammit pilluaqqoqqippassi.
Qanoq iliorlusi allannguinaqataasinnaanersi eqqarsaatigisiuk!
Puigussanngilarsilu peqataasinnaagassi sulerulunnertaqanngitsumik